

Kepentingan Memberi Salam dan Etika Berpakaian Menurut Islam

BITARAVolume 1, Issue 3, 2018: 084-097
© The Author(s) 2018
e-ISSN: 2600-9080
<http://www.bitarajournal.com>

Dasima Sidek,¹ Roslan Ab Rahman,¹ Khiral Anuar Daud,¹ Mohd Borhanuddin Zakaria,¹ Abdul Qahhar Ibrahim¹ & Noorsafuan Che Noh¹

Abstrak

Islam telah menetapkan hukum pergaulan sesama manusia dengan jelas terutama antara lelaki dan wanita bagi memelihara keharmonian hidup mereka sendiri. Kajian tentang adab-adab memberi salam dan cara berpakaian menurut Islam dilakukan adalah berdasar kepada budaya sosial dalam masyarakat khususnya kalangan pelajar yang tidak menitikberatkan amalan-amalan mulia seperti adab memberi salam dan gaya berpakaian yang lari dari landasan agama Islam. Adakah permasalahan tersebut disebabkan oleh pelajar masih lagi kurang memahami hal berkaitan salam dan cara sebenar dalam berpakaian menurut Islam sehingga menyebabkan berlakunya pelanggaran batas akhlak pelajar dalam pergaulan mereka. Justeru, objektif kajian ini ialah perlunya membuat penyelidikan pandangan fuqaha' tentang pergaulan dalam Islam khusus kepada adab memberi salam dan etika berpakaian. Metode kajian kepustakaan dipilih bagi melihat pandangan fuqaha' dalam perkara memberi salam dan soal berpakaian menurut fiqh Islami. Hasil kajian ini mendapati bahawa adab-adab memberi salam dan cara berpakaian menurut Islam sudah jelas dan lengkap serta relevan diamalkan sepanjang masa termasuk dalam era globalisasi ini. Islam adalah agama yang menitikberatkan pergaulan yang mesra dan mementingkan penjagaan maruah seseorang seperti dalam penjagaan aurat antara sesama insan. Penghayatan terhadap amalan mulia ini akan dapat menghindarkan diri dari terjebak dalam kancuh pergaulan bebas yang membawa kepada kerosakan dan kemurkaan Allah SWT. Implikasi kajian adalah perlunya sesebuah organisasi terutamanya peringkat sekolah membuat penambahbaikan bagi mendidik para pelajar untuk menghayati amalan tersebut sesama warga sekolah. Seterusnya nanti amalan tersebut akan berkembang dalam kehidupan bermasyarakat.

Kata Kunci

Salam, Etika, Fiqh, Pakaian

Cite This Article:

Dasima Sidek, Roslan Ab Rahman, Khiral Anuar Daud, Mohd Borhanuddin Zakaria, Abdul Qahhar Ibrahim & Noorsafuan Che Noh. 2018. Kepentingan memberi salam dan etika berpakaian menurut Islam. *BITARA International Journal of Civilizational Studies and Human Sciences* 1(3): 084-097.

Pengenalan

Islam sememangnya menganjurkan pergaulan yang harmoni sesama insan terutamanya sesama muslim. Buktinya penganjuran bertegur sapa seperti adab memberi salam sesama muslim apabila bertemu amat digalakkan. Di samping itu penjagaan aurat juga diwajibkan bagi

¹ Universiti Sultan Zainal Abidin, Terengganu, Malaysia.

Corresponding Author:

Roslan Ab Rahman, Universiti Sultan Zainal Abidin, Terengganu, Malaysia.
E-mail: roslanabr@unisza.edu.my

menjamin batas-batas pergaulan yang tidak berbentuk bebas sehingga membawa kepada kerosakan dan kemurkaan Allah SWT.

Pembahagian Hukum Pergaulan dalam Islam

Hukum pergaulan pada asasnya terbahagi kepada dua iaitu: harus secara mutlak dan harus secara bersyarat.

Pertamanya, hukum harus secara mutlak adalah bagi pergaulan antara lelaki dengan lelaki dan perempuan dengan perempuan. Antara tuntutan seperti mempunyai hajat, iaitu ada perkara yang perlu melibatkan kaum lelaki dan perempuan. Selain itu, menjalankan tuntutan dakwah, yakni amar makruf nahi mungkar dan menghadiri jemputan, contohnya: kenduri kahwin dan lain-lain. Selain itu, tuntutan menunaikan haji dan umrah, bermesyuarat atau pembentangan seminar, yakni yang perlu melibatkan kaum lelaki dan perempuan dalam sesuatu majlis.

Keduanya hukum harus bersyarat, antara syarat-syarat yang mesti dipenuhi adalah:

i. Tidak bersentuhan

Daripada Jabir bin ‘Abd Allah (RA), Rasulullah (SAW) ada bersabda:

إِذَا خَطَبَ أَحَدُكُمْ الْمَرْأَةَ فَإِنْ اسْتَطَاعَ أَنْ يَنْظُرَ إِلَى مَا يَدْعُوهُ إِلَى نِكَاحِهَا فَالْيَفْعَلْ

Maksudnya, “Apabila seorang lelaki meminjau seseorang wanita, dibolehkan lelaki itu melihat wanita yang hendak dipinang itu” (al-Busti 1991)

Menurut Shaykh al-Busti (1991) dalam menghuraikan hadis ini, bahawa diharuskan seorang lelaki melihat wanita bukan mahram kepada muka dan kedua tapak tangan sahaja samada diizinkan oleh wanita itu atau tidak. Oleh itu penulis berpandangan Islam melarang melihat wanita bukan mahram tanpa sebarang keperluan yang diharuskan syarak. Manakala menyentuhnya adalah lebih lagi dilarang.

ii. Menjaga aurat

Antaranya ialah firman Allah SWT dalam Surah al-Nur 24:31:

وَقُلْ لِلْمُؤْمِنَاتِ يَغْضُضْنَ مِنْ أَبْصَرِهِنَّ وَيَحْفَظْنَ فُرُوجَهُنَّ وَلَا يُبْدِينَ زِينَتَهُنَّ إِلَّا مَا ظَهَرَ مِنْهَا وَلْيَضْرِبْنَ بِخُمُرِهِنَّ عَلَىٰ جُيُوبِهِنَّ وَلَا يُبْدِينَ زِينَتَهُنَّ إِلَّا لِبُعُولَتِهِنَّ أَوْ آبَائِهِنَّ أَوْ آبَاءِ بُعُولَتِهِنَّ أَوْ أَبْنَاءِ بُعُولَتِهِنَّ أَوْ إِخْوَانِهِنَّ أَوْ بَنِي إِخْوَانِهِنَّ أَوْ بَنِي أَخَوَاتِهِنَّ أَوْ نِسَائِهِنَّ أَوْ مَا مَلَكَتْ أَيْمَانُهُنَّ أَوِ التَّابِعِينَ غَيْرَ أُولِي الْإِرْتِبَاعِ مِنَ الرِّجَالِ أَوِ الطِّفْلِ الَّذِينَ لَمْ يَظْهَرُوا عَلَىٰ عَوْرَاتِ النِّسَاءِ وَلَا يُضْرَبْنَ بِأَرْجُلِهِنَّ لِيُعْلَمَ مَا يُخْفِينَ مِنَ زِينَتِهِنَّ وَتُوبُوا إِلَى اللَّهِ جَمِيعًا أَيُّهُ الْمُؤْمِنُونَ لَعَلَّكُمْ تُفْلِحُونَ ﴿٣١﴾

Maksudnya: “Dan katakanlah kepada perempuan-perempuan yang beriman supaya menyekat pandangan mereka (daripada memandang yang haram), dan memelihara kehormatan mereka; dan janganlah mereka memperlihatkan perhiasan tubuh mereka kecuali yang zahir daripadanya; dan hendaklah mereka menutup belahan leher bajunya dengan tudung kepala mereka; dan janganlah mereka memperlihatkan perhiasan tubuh mereka melainkan kepada suami mereka, atau bapa mereka atau bapa mertua mereka atau anak-anak mereka, atau anak-anak tiri mereka, atau saudara-saudara mereka, atau anak bagi saudara-saudara mereka yang lelaki, atau anak bagi saudara-saudara mereka yang perempuan, atau perempuan-perempuan Islam, atau hamba-hamba mereka, atau orang gaji dari orang-orang lelaki yang telah tua dan tidak berkeinginan kepada perempuan, atau kanak-kanak yang belum mengerti lagi tentang aurat perempuan; dan janganlah mereka menghentakkan kaki untuk diketahui orang akan apa yang tersembunyi dari perhiasan mereka; dan bertaubatlah kamu sekalian kepada Allah, wahai orang-orang yang beriman, supaya kamu berjaya.”

iii. Menjaga adab bercakap.

Firman Allah SWT dalam Surah al-Ahzab 33:32:

يٰۤاَيُّهَا نِسَاءَ النَّبِيِّ لَسْتُنَّ كَأَحَدٍ مِّنَ النِّسَاءِ ۗ اِنَّ اَتَّقِيْنَ فَلَآ تَخْضَعْنَ بِالْقَوْلِ فَيَطْمَعَ الَّذِيْ فِيْ قَلْبِهٖ مَّرَضٌ وَقَلْنَ قَوْلًا مَّعْرُوفًا ﴿٣٢﴾

Maksudnya, “Wahai isteri-isteri nabi, kamu bukanlah seperti perempuan-perempuan lain jika kamu bertakwa. Maka janganlah lemah-lembutkan suara dalam berbicara, sehingga bangkit nafsu orang yang ada penyakit dalam hatinya, tetapi ucapkanlah perkataan yang baik”.

iv. Bukan di tempat yang tertutup.

Merujuk kepada hadis daripada ‘Uqbah bin ‘Amir bahawa Nabi (SAW) bersabda:

إِيَّاكُمْ وَالذُّخُولَ عَلَى النِّسَاءِ " فَقَالَ رَجُلٌ مِّنَ الْأَنْصَارِ: يَا رَسُولَ اللَّهِ؟ أَفَرَأَيْتَ الْحُمُومَ؟ قَالَ: الْحُمُومُ الْمَوْتُ

Maksudnya, “Jaga-jaga kamu bila bersama wanita. Kata lelaki Ansar: Wahai Rasulullah! Macam mana dengan ipar? Jawab Baginda (SAW): “Ipar itu maut” (al-‘Asqalani 1986, 9:242)

Dalam hadis riwayat Ahmad daripada ‘Amir bin Rabi’ah:

"لَا يَجْلُونَ أَحَدَكُمْ بِأَمْرَةِ فَإِنَّ الشَّيْطَانَ ثَالِثُهُمَا "

Maksudnya, “Janganlah salah seorang dari kalian berkhalwat dengan seorang wanita karena sesungguhnya syaitan menjadi orang ketiga di antara mereka berdua” (al-‘Asqalani 1986, 9:243).

Berdasarkan kepada pernyataan hukum pergaulan di atas, dapat dirumuskan bahawa Islam amat menjaga batas-batas pergaulan terutama yang melibatkan kaum lelaki dan wanita, walaupun seorang bergelar ipar tetap sebagai bukan mahram. Ini jelas menunjukkan bahawa Islam dari awal lagi sudah meletakkan batas-batas pergaulan demi menjaga maruah umatnya. Secara peribadi, penulis bersetuju dengan pandangan yang mengharuskan pergaulan antara lelaki dan wanita secara bersyarat. Ini kerana syarat-syarat yang diletakkan adalah bersifat rasional dan bukanlah mengongkang kaum wanita. Jika tidak mampu memenuhi syarat tersebut adalah lebih baik mengelakkan dari terlibat dengan pergaulan. Disini penulis menganggap pergaulan yang tidak memenuhi syarat tersebut adalah satu pergaulan bebas yang boleh membawa seseorang itu terjebak dengan maksiat. Hal ini bertepatan dengan firman Allah (SWT) al-Isra' 17:32:

وَلَا تَقْرُبُوا الزِّنَىٰ إِنَّهُ كَانَ فَحِشَةً وَسَاءَ سَبِيلًا ﴿٣٢﴾

Maksudnya, “Dan janganlah kamu menghampiri zina, sesungguhnya zina itu adalah satu perbuatan yang keji dan satu jalan yang jahat (yang membawa kerosakan)”.

Dalam ayat ini Allah SWT melarang perbuatan zina dari awal lagi dengan melarang melakukan perkara-perkara yang menghampirkan seseorang kepada zina seperti pergaulan bebas, khalwat antara lelaki dan perempuan dan sebagainya.

Adab-adab dan Batas Pergaulan dalam Islam

Seperti dibicarakan di atas, Islam telah menggariskan dari awal lagi tentang adab dan batas pergaulan umatnya. Perkara ini adalah untuk menjamin umatnya tidak tersasar dari landasan hukum yang ditetapkan dan menjamin keharmonian hidup bermasyarakat antara sesama manusia. Diantara adab-adab mulia yang dianjurkan oleh Islam adalah seperti berikut;

Memberi dan Menjawab Salam

Amalan memberi salam amat digalakkan dalam Islam. Dalam bahasa Arab, kalimah al-Salam bermaksud keselamatan, keamanan dan kebebasan daripada keaiban (Anis t.th., 1:446) berasal daripada perkataan *al-Salam* dalam Islam ialah ucapan kesejahteraan dari seorang Muslim kepada seorang Muslim yang lain. Berdasarkan kepada firman Allah (SWT) al-Nisa' 3:86:

وَإِذَا حُيِّتُمْ بِتَحِيَّةٍ فَحَيُّوا بِأَحْسَنَ مِنْهَا أَوْ رُدُّوهَا إِنَّ اللَّهَ كَانَ عَلَىٰ كُلِّ شَيْءٍ حَسِيبًا ﴿٨٦﴾

Maksudnya, “Dan apabila kamu diberikan penghormatan dengan sesuatu ucapan hormat (seperti memberi salam), maka balaslah penghormatan itu dengan yang lebih baik daripadanya, atau balaslah dia (dengan cara yang sama). Sesungguhnya Allah sentiasa menghitung tiap-tiap sesuatu”.

يٰٓأَيُّهَا الَّذِينَ ءَامَنُوا لَا تَدْخُلُوا بُيُوتًا غَيْرَ بُيُوتِكُمْ حَتَّىٰ تَسْتَأْذِنُوا وَتَسَلِّمُوا عَلَىٰ أَهْلِهَا ذَٰلِكُمْ خَيْرٌ لَّكُمْ لَعَلَّكُمْ تَذَكَّرُونَ ﴿٢٧﴾

Maksudnya, “Wahai orang-orang yang beriman, janganlah kamu masuk ke dalam mana-mana rumah yang bukan rumah kamu, sehingga kamu lebih dahulu meminta izin serta memberi salam kepada penduduknya; yang demikian adalah lebih baik bagi kamu, supaya kamu beringat (mematuhi cara dan peraturan yang sopan itu)” Al-Nur 24:27.

Antara hadis Rasulullah (s.a.w) dalam bab memberi salam adalah seperti berikut:

أَمَرَنَا رَسُولُ اللَّهِ صَلَّى اللَّهُ عَلَيْهِ وَسَلَّمَ بِسَبْعٍ: بِعِيَادَةِ الْمَرِيضِ، وَاتِّبَاعِ الْجَنَائِزِ، وَتَشْمِيتِ الْعَاطِسِ، وَنَصْرِ الضَّعِيفِ، وَعَوْنِ الْمَظْلُومِ، وَإِفْشَاءِ السَّلَامِ... الحديث

Maksudnya, “Rasulullah (s.a.w) menyuruh kita dengan 7 perkara iaitu: menziarahi pesakit, mengiringi jenazah, mengucapkan “*Yarhamukallah*” kepada orang bersin, menolong orang susah, membantu orang dizalimi, memberi salam ...al-Hadis ” (al-‘Asqalani 1986, 11: 20. No Hadis: 6235).

Dalam hadis lain Rasulullah (s.a.w) ditanya apakah amalan baik dalam Islam, Baginda menjawab: *تُطْعِمُ الطَّعَامَ وَتَقْرَأُ السَّلَامَ عَلَىٰ عَرَفْتٍ وَعَلَىٰ مَنْ لَا تَعْرِفُ*. Maksudnya: “Memberi makan dan memberi salam samada kepada orang yang kamu kenali dan tidak dikenali”.

Berdasarkan dalil di atas, ternyata adab memberi salam antara sesama muslim adalah satu amalan yang dituntut dalam Islam walaupun kepada orang yang kita tidak kenali. Manakala menjawabnya pula adalah satu kewajipan (al-‘Asqalani 1986, 11: 20) Apatah lagi antara sanak saudara, sahabat handai dan guru.

Seterusnya, memberi dan menjawab salam kepada bukan mahram selain tujuan pendidikan dan pembelajaran termasuk juga dalam sukatan Pendidikan Syariah Islamiah (seterusnya PSI). Dalam perihal memberi salam terdapat adab-adab dan larangan tertentu kerana ia tidak boleh diberikan dengan sewenang-wenangnya. Antara yang berkaitan dalam PSI adalah tatacara dan hukum memberi salam kepada bukan mahram. Salam yang dimaksudkan di sini adalah ucapan salam dan bukannya berjabat tangan kerana hukum berjabat antara lelaki dan perempuan ajnabi yang bukan mahram, maka ianya adalah haram jika dengan syahwat, namun diharuskan jika dengan perempuan tua yang tiada keinginan syahwat (al-‘Asqalani 1986, 11: 20). Menurut Imam al-Nawawi (t.t) dalam membicarakan bab salam:

سَلَامُ الرَّجُلِ عَلَىٰ زَوْجَتِهِ وَالْمَرْأَةِ مِنْ مَحَارِمِهِ وَعَلَىٰ أَعْيُنِيَّةٍ وَأَجْنَبِيَّاتٍ لَا يَخَافُ الْفِتْنَةَ بِهِنَّ، وَسَلَامُهُنَّ بِهَذَا الشَّرْطِ

Maksudnya, “Salam orang lelaki kepada isterinya dan wanita yang menjadi mahramnya dan kepada wanita ajnabi (seorang atau ramai) yang tidak dikhuatiri tidak menimbulkan fitnah. Begitulah juga salam perempuan kepada lelaki dengan syarat tidak menimbulkan fitnah.” (al-Nawawi t.t.: 321).

Dalam hal ini, antara 3 hadis menjadi sandarannya adalah daripada perbuatan Sahabat dan juga perbuatan Rasulullah (SAW). Hadis pertama adalah riwayat al-Bukhari iaitu:

عَنْ سَهْلِ بْنِ سَعْدٍ رَضِيَ اللَّهُ عَنْهُ قَالَ: كَانَتْ فِيْنَا امْرَأَةٌ وَفِي رِوَايَةٍ كَانَتْ لَنَا عَجُوزٌ تَأْخُذُ مِنْ أَصُولِ السِّلْقِ فَتَطْرُحُهُ فِي الْفَدْرِ وَتُكْرِكِرُ حَبَّاتٍ مِنْ شَعِيرٍ ' فَإِذَا صَلَّيْنَا الْجُمُعَةَ انْصَرَفْنَا نُسَلِّمُ عَلَيْهَا فَتَقْدِمُهُ إِلَيْنَا

Maksudnya: “Dari Sahl bin Sa‘ad (RA) katanya: “Kami mempunyai seorang perempuan, adapun dalam riwayat lain kami mempunyai seorang wanita yang sudah tua yang suka mengambil rempah-rempah dan dimasukkan dalam kualiti kemudian dicampur dengan tepung (*sha'ir*), maka setelah kami kembali dari mengerjakan solat Jumaat, kami mengucapkan salam kepada wanita tadi, kemudian ia menghidangkan makanan yang dimasakannya itu kepada kami...”. (al-‘Asqalani 1986, 11:35, Hadis No. 6248; al-Nawawi 1995: 59)

Hadis kedua adalah riwayat Muslim (al-‘Asqalani 1986, 11:35, Hadis No. 6248; al-Nawawi 1995: 59):

عَنْ أُمِّ هَانِيٍّ فَاخْتَتِ بِنْتُ أَبِي طَالِبٍ رَضِيَ اللَّهُ عَنْهَا قَالَتْ: أَتَيْتُ النَّبِيَّ صَلَّى اللَّهُ عَلَيْهِ وَسَلَّمَ يَوْمَ الْفَتْحِ وَهُوَ يَغْتَسِلُ وَفَاطِمَةُ تَسْتَرُهُ فَسَلَّمْتُ ' وَذَكَرْتُ الْحَدِيثَ".

Maksudnya: “Ummu Hani’ (Fakhitah) binti Abi Talib (RA) berkata: Saya datang kepada Nabi (SAW) ketika pembukaan kota Mekah, sedang Nabi mandi dan ditutupi kain oleh Fatimah, maka saya memberi salam kepadanya”.

Manakala hadis ketiga diriwayatkan oleh Abu Dawud dan al-Tirmidhi:

عَنْ أَسْمَاءَ بِنْتِ يَزِيدٍ رَضِيَ اللَّهُ عَنْهَا قَالَتْ: مَرَّ عَلَيْنَا النَّبِيُّ صَلَّى اللَّهُ عَلَيْهِ وَسَلَّمَ فِي نِسْوَةٍ فَسَلَّمَ عَلَيْنَا

Maksudnya: Daripada Asma binti Yazid (RA) katanya: “Nabi (SAW) berjalan melalui kami (kumpulan kaum wanita), lalu Baginda (SAW) mengucapkan salam kepada kami.”

Berdasarkan hadis-hadis tersebut, hukum memberikan salam antara lelaki perempuan itu adalah dibolehkan dengan syarat ianya tidak menimbulkan fitnah dan menjurus kepada perkara-perkara haram. Hukum asal *ikhtilat* (percampuran/pergaulan) antara lelaki bukan mahram (Ajnabi) dan perempuan Ajnabi adalah haram, melainkan ada sebab-sebab yang dibenarkan oleh syarak seperti proses pendidikan dan pembelajaran. Oleh itu, apabila seseorang lelaki atau pelajar lelaki ingin memberikan salam kepada perempuan atau sebaliknya, perlu diperhalusi, adakah ianya mengikut keperluan syarak atau sekadar suka-suka. Sekiranya tidak jelas, maka lebih baik jauhilah dan perlu ada rasa bimbang terhadap fitnah wanita. Sabda Rasulullah (SAW):

مَا تَرَكَتُ بَعْدِي فِتْنَةٌ هِيَ أَضْرُّ عَلَى الرَّجَالِ مِنَ النِّسَاءِ

Maksudnya: “Tidak aku tinggalkan selepas kewafatanku fitnah yang lebih memudaratkan ke atas lelaki berbanding fitnah wanita.” (أخرجه البخاري، كتاب النكاح، باب (5096): ما يتقى من شؤم المرأة، (8/7)، برقم

Pemerhatian terhadap nas-nas umumnya menyuruh supaya menyebarkan salam, dan didapati ia tidak membezakan antara lelaki dan wanita seperti hadis yang menyeru supaya memberi makanan, menyebarkan salam, menghubungkan tali persaudaraan, sembahyang malam dalam keadaan orang lain sedang tidur.

Menurut Imam al-Nawawi (t.th.: 321), memberi salam dan menjawab salam antara lelaki dan perempuan adalah seperti hukum memberi dan menjawab salam sesama lelaki. Sunat bagi seorang perempuan memberi salam kepada lelaki, dan begitulah sebaliknya dan salam itu wajib dijawab jika perempuan itu adalah mahramnya. Persoalannya bagaimana pula jika perempuan berkenaan bukan mahramnya. Apabila perempuan itu bukan mahramnya dan merupakan seorang yang cantik jelita yang dikhuatiri akan menimbulkan fitnah, maka seorang lelaki tidak boleh memberi salam kepadanya. Jika lelaki itu memberi salam pula, perempuan berkenaan tidak boleh menjawabnya. Begitu juga dengan perempuan itu, dia tidak boleh memberi salam. Jika perempuan itu memberi salam, maka hukumnya adalah makruh untuk menjawab salam daripada perempuan yang dibicarakan di atas.

Jelasnya, perempuan tidak boleh memberi dan menerima salam kepada atau dari lelaki yang bukan mahramnya tanpa apa-apa keperluan yang dibenarkan syarak. Adapun jika perempuan itu tua dan tidak mungkin akan menimbulkan fitnah, dia boleh memberi salam kepada seorang lelaki dan salam itu wajib dijawab oleh lelaki berkenaan. Ini adalah antara hukum memberi salam antara lelaki dan perempuan secara seorang dengan seorang.

Manakala jika lelaki memberi salam kepada sekumpulan perempuan yang bukan mahram atau perempuan memberi salam kepada sekumpulan lelaki yang bukan mahramnya pula seperti dibicarakan oleh Imam al-Nawawi (Ibid) mengatakan bahawa jika ramai perempuan berkumpul dalam satu kumpulan, maka lelaki itu boleh memberi salam kepada mereka atau menjawabnya. Begitu juga sekumpulan lelaki boleh memberi salam dan menjawabnya kepada seorang perempuan dan ia dibolehkan apabila tidak ditakutkan timbulnya fitnah bagi kedua belah pihak. Perkara ini adalah berdasarkan juga kepada hadis yang dinyatakan di awal topik ini kerana berlakunya antara seorang perempuan dan sekumpulan lelaki dan sebaliknya.

Berdasarkan kepada dalil-dalil dan pandangan ulama' di atas dapat disimpulkan bahawa memberi salam kepada perempuan mahram adalah seperti hukum memberi salam kepada sesama lelaki. Tidak boleh memberi salam atau menjawab salam perempuan yang dikhuatiri akan menimbulkan fitnah. Dibolehkan memberi salam kepada perempuan bukan mahram yang tidak menimbulkan sebarang fitnah seperti antara seorang guru atau seorang pelajar lelaki dan sekumpulan pelajar perempuan. Manakala salam daripada perempuan tersebut pula wajib dijawab. Diharuskan memberi salam kepada sekumpulan wanita atau sekumpulan lelaki memberi salam kepada seorang wanita. Demikianlah juga seperti apa yang berlaku di sekolah antara pelajar atau guru perempuan dan pelajar atau guru lelaki, adab dan batasnya juga berdasarkan kepada hukum seperti yang dibicarakan.

Adab Berpakaian dan Batasan Aurat

Islam mengharuskan setiap muslim dan muslimah berketerampilan baik dan cantik dengan perhiasan diri yang dikurniakan oleh Allah SWT. Namun begitu, soal berpakaian dan berhias diri pada prinsip dasarnya menurut Islam adalah menutup aurat samada lelaki mahupun perempuan. Yusuf al-Qaradawi (1993: 79) menyatakan terdapat dua tujuan dari mengenakan pakaian dari kaca mata Islam iaitu, menutup aurat dan perhiasan. Sesiapa yang melampaui dari garisan kedua-dua perkara tersebut maka ia telah menyimpang dari landasan Islam dan menuju ke jalan syaitan.

Mengenai pakaian atau perhiasan yang dilarang dalam Islam adalah seperti emas dan sutera diharamkan kepada lelaki dan diharuskan kepada perempuan. Pandangan beliau berdasar kepada hadis daripada Abu Musa al-Ash'ari bahawa Rasulullah (SAW) bersabda:

" حُرِّمَ لِبَاسُ الْحَرِيرِ وَالذَّهَبِ عَلَى ذُكُورِ أُمَّتِي وَأَحْلَى لِإِنَائِهِمْ "

Maksudnya, "Diharamkan pakaian dari sutera dan emas kepada lelaki dari umatku namun halal bagi wanita".

Dalam hadis lain pula:

عن حذيفة رضي الله عنه قال: نهانا النبي صلى الله عليه وسلم أن نتشرب في أنيئة الذهب والفضة وأن نأكل فيها ' وعن لبس الحرير والديباج ' وأن تجلس عليها "

Maksudnya, "Diriwayatkan daripada Abu Hudhaifah (r.a) Nabi (s.a.w) melarang kami makan dan minum dari bekas emas dan perak, Nabi juga melarang kami memakai baju dari kain sutera atau duduk di atasnya".

عن عمر رضي الله عنه: قال النبي صلى الله عليه وسلم: مَنْ لَبَسَ الْحَرِيرَ فِي الدُّنْيَا لَمْ يَلْبَسْهُ فِي الْآخِرَةِ

Maksudnya, "Diriwayatkan daripada 'Umar (r.a): Nabi (s.a.w) pernah bersabda: Lelaki yang mengenakan pakaian sutera di dunia tidak akan memakainya di akhirat". (al-Mundhiri,2004.hl:841)

Kesimpulannya, pakaian atau kain sutera dan emas adalah diharamkan kepada kaum lelaki, namun diharuskan kepada kaum wanita. Manakala bekas makanan atau minuman yang diperbuat daripada emas dan perak adalah dilarang dalam Islam.

Seperti dibicarakan dalam soal pemakaian, setiap muslim atau muslimah perlu mematuhi garis panduan berdasarkan kepada penjagaan aurat dalam Islam. Ini kerana fungsi utama memakai sesuatu pakaian adalah untuk menutup aurat masing-masing. Menurut Wahbah al-Zuhayli (1991, 18:223) dalam membicarakan tafsiran ayat surah al-Nur 30-31), membahagikan perihal aurat kepada 4 kategori iaitu:

- i. Aurat lelaki dengan lelaki. Batasannya adalah antara pusat dan lutut. Tidak diharuskan mereka tidur bersama dalam keadaan mengiring antara keduanya (*al-Mudaja'ah*). Makruh

- pula bagi mereka untuk berpelukan (*al-Mu'anaqah*: melagakan tengkuk) melainkan dengan anak kandungnya. Adapun berjabat tangan (*al-Musafahah*) adalah diharuskan.
- ii. Aurat perempuan dengan perempuan. Batasannya sama seperti aurat antara lelaki dengan lelaki iaitu antara pusat dan lutut. Tidak diharuskan juga tidur secara *al-Mudaja'ah* antara mereka seperti hukum sesama lelaki. Adapun jika bersama perempuan bukan muslimah, badan mereka tidak boleh didedahkan kecuali muka dan kedua tangan.
 - iii. Aurat perempuan dengan lelaki. Sekiranya perempuan itu bukan mahramnya maka seluruh badannya aurat kecuali muka dan kedua tangannya. Lelaki itu tidak boleh memandangnya melainkan ada keperluan diharuskan syarak seperti jual beli, semasa pertunangan dan merawat pesakit. Adapun jika lelaki itu ialah mahramnya dengan sebab keturunan, susuan atau persemendaan (*al-Musaharah*), maka aurat perempuan itu adalah antara pusat dan lutut. Manakala jika perempuan itu sebagai isteri kepada lelaki tersebut, suaminya harus melihat seluruh badan dan kemaluannya (isteri) pula makruh dilihat.
 - iv. Aurat lelaki dengan perempuan. Jika lelaki itu bukan mahram, maka auratnya antara pusat dan lutut. Namun sekiranya lelaki itu sebagai suami kepada perempuan itu, beliau boleh melihat seluruh badan suaminya dan makruh melihat kemaluannya (suami).

Dalam meniti arus kemajuan fesyen masa kini terutama bagi wanita, Islam bukanlah menafikannya secara total namun prinsip asasnya adalah memenuhi konsep menutup aurat sebenar seperti dibicarakan. Termasuk juga pakaian yang tidak ketat sehingga nampak bentuk tubuh badan wanita tersebut. Menurut Yusuf al-Qardawi (1993: 84), Islam mengharamkan wanita berpakaian sedemikian sehingga nampak bentuk badan terutama pada buah dada, pinggang dan sebagainya yang boleh menimbulkan fitnah. Sebuah hadis riwayat Muslim daripada Abu Hurairah (r.a) berkata Rasulullah (s.a.w) ada bersabda:

صِنْفَانِ مِنَ أَهْلِ النَّارِ لَمْ أَرَهُمَا: قَوْمٌ مَعَهُمْ سَبَاطٌ كَأَذْنَابِ الْبَقَرِ يَضْرِبُونَ بِهَا النَّاسَ ' وَنِسَاءٌ كَاسِيَاتٌ عَارِيَاتٌ ' مُمِيلَاتٌ مَائِلَاتٌ رُؤُوسُهُنَّ كَأَسْنِمَةِ الْبُخْتِ الْمَائِلَةِ لَا يَدْخُلْنَ الْجَنَّةَ وَلَا يَجِدْنَ رِيحَهَا ' وَأَنْ رِيحَهَا لَتُوجَدَ مِنْ مَسِيرَةِ كَذَا وَكَذَا

Maksudnya, “Dua golongan ahli neraka yang aku belum melihatnya, iaitu pertamanya orang yang memiliki cemeti seperti ekor sapi untuk memukul orang lain. Keduanya, wanita-wanita setengah telanjang (kerana kainnya terlalu nipis, terlalu pendek atau terlalu ketat) merangsang lagi merayu. Rambut mereka dianyam seperti bonggol unta. Mereka tidak akan masuk syurga bahkan tidak dapat mencium baunya, padahal bau syurga dapat terasa dari jarak perjalanan yang jauh”. (al-Mundhiri 2004: 785)

Berdasarkan kedudukan dan batasan pakaian serta aurat yang dibicarakan di atas, penulis merumuskan antara garis panduan pakaian yang memenuhi ciri-ciri menutup aurat mengikut syaria Islam adalah seperti berikut:

Pertama: Pakaian lelaki, kain yang tebal (tidak nipis) tidak nampak kulit atau bentuk tubuh, longgar atau tidak ketat sehingga nampak bentuk tubuh dan tidak menyerupai pakaian wanita.

Kedua: Pakaian wanita, menutup seluruh badan kecuali apa yang terdapat dalam syariat seperti dibicarakan pada awal topik ini, labuh sehingga menutup kaki atau pakai stokin, tidak

ada hiasan berlebihan pada pakaian, kainnya tebal yang tidak tembus dipandang, tidak sempit sehingga terlihat bentuk tubuh badan, lebih elok berwarna gelap, tidak berwarna-warni berlebihan (boleh menarik perhatian), tidak menyerupai pakaian lelaki, tidak menjolok mata, tidak menyerupai pakaian ibadah agama lain dan tidak mengenakan bau-bauan secara berlebihan. Ciri-ciri ini bertepatan dengan apa terdapat dalam garis panduan pakaian wanita Islam yang bekerja (Nik Ismah 1989: 6-22)

Kesimpulannya, menutup aurat adalah satu kewajipan yang mesti dipatuhi oleh setiap muslimin dan Muslimat terutama apabila mereka keluar rumah seperti pergi bekerja dan sebagainya. Hikmah Islam memberi garis panduan dalam berpakaian dan berhias adalah bagi menjaga maruah umatnya terutama kepada kaum wanita yang sering dikaitkan dengan pendedahan aurat. Dalam konteks pelajar sekolah adalah sama juga, mereka perlu menjaga batasan aurat dalam pergaulan sesama mereka, samada antara sesama pelajar perempuan atau antara pelajar lelaki dan pelajar perempuan dan sebaliknya. Termasuk juga guru dan warga sekolah lain tetap tertakluk kepada batasan menutup aurat seperti dibicarakan.

Memelihara Ukhuwah Islamiah

Perkataan ukhuwah membawa maksud persaudaraan manakala ukhuwah Islamiah ialah persaudaraan yang berlandaskan ajaran Islam. Islam menganjurkan agar ukhuwah Islamiah dipelihara dalam kalangan masyarakat agar masyarakat tersebut menjadi kuat dan akrab antara satu sama lain (Yakan 1983: 172) Islam telah meletakkan asas bahawa sesama orang Islam adalah bersaudara tanpa mengira bangsa dan keturunan seperti firman Allah (s.w.t) dalam surah al-Hujurat 49:10:

إِنَّمَا الْمُؤْمِنُونَ إِخْوَةٌ

Maksudnya, “Sebenarnya orang-orang yang beriman itu adalah bersaudara”.

Firman-Nya lagi dalam surah Ali ‘Imran 3:103:

وَاعْتَصِمُوا بِحَبْلِ اللَّهِ جَمِيعًا وَلَا تَفَرَّقُوا

Maksudnya, “Dan berpegang teguhlah kamu sekalian kepada tali Allah (agama Islam) dan janganlah kamu bercerai-berai”.

Sebuah hadis daripada Abu Musa bahawa Nabi (s.a.w) bersabda: " الْمُؤْمِنُ لِلْمُؤْمِنِ كَالْبُنْيَانِ يَشُدُّ " " الْمُؤْمِنُ لِلْمُؤْمِنِ كَالْبُنْيَانِ يَشُدُّ " بَعْضُهُمْ بَعْضًا ' ثُمَّ شَبَّكَ بَيْنَ أَصَابِعِهِ " Maksudnya, “Seorang mukmin dengan mukmin yang lain umpama sebuah bangunan saling menguatkan antara satu sama lain tak ubah seperti jari-jemarinya yang memegang sesuatu benda” (al-‘Asqalani 1986, 10:464, No. Hadis: 6026) Berdasarkan dalil ini menunjukkan bahawa penekanan terhadap ukhuwah Islamiah adalah signifikan dan relevan pada era globalisasi ini.

Hal ini adalah amat bertepatan dengan peribahasa Melayu ‘cubit paha kanan paha kiri sakit juga’ (Kamus Dewan 1996: 957) Bagaimana ukhuwah Islamiah itu akan dapat dipelihara? Dalam konteks kajian ini, persaudaraan ini akan hanya boleh dikekalkan dengan mengamalkan amalan seperti memberi salam dan berbuat baik sesama muslim lain samada sesama pelajar,

guru dan keluarga mahu pun masyarakat. Di samping itu perlu menjauhi perkara-perkara maksiat seperti mendedahkan aurat, mengumpat, memfitnah, memanggil dengan gelaran yang buruk, mencari-cari kesalahan dan keaiban orang lain. Hal ini jelas dinyatakan oleh Allah dalam firman-Nya (surah al-Ahzab 33:11-12).

Perbuatan menghina orang lain dalam Islam adalah dilarang sama sekali. Orang kaya tidak boleh menghina orang miskin. Sesungguhnya semua manusia adalah sama dari segi pangkat dan darjat. Hanya ketakwaan sahaja yang membezakan mereka antara satu sama lain. Firman Allah (SWT) dalam surah al-Hujurat 49:13:

يٰٓأَيُّهَا النَّاسُ إِنَّا خَلَقْنَاكُمْ مِنْ ذَكَرٍ وَأُنْثَىٰ وَجَعَلْنَاكُمْ شُعُوبًا وَقَبَائِلَ لِتَعَارَفُوا ۗ إِنَّ أَكْرَمَكُمْ عِنْدَ اللَّهِ أَتَقْوَمُ ۗ إِنَّ اللَّهَ عَلِيمٌ خَبِيرٌ ﴿١٣﴾

Maksudnya, “Wahai umat manusia! Sesungguhnya Kami telah menciptakan kamu dari lelaki dan perempuan, dan Kami telah menjadikan kamu berbagai bangsa dan bersuku puak, supaya kamu berkenal-kenalan (dan beramah mesra antara satu dengan yang lain). Sesungguhnya semulia-mulia kamu di sisi Allah ialah orang yang lebih taqwanya di antara kamu, (bukan yang lebih keturunan atau bangsanya). Sesungguhnya Allah Maha Mengetahui, lagi Maha mendalam pengetahuannya (akan keadaan dan amalan kamu).

Mencela orang lain juga sangat dilarang dalam Islam. Perbuatan yang tidak bermoral tersebut memberi kesan yang amat buruk kepada individu lain. Jika tidak dibendung, sesebuah masyarakat akan menjadi porak-peranda kerana saling berbalah antara satu sama lain. Paling menyedihkan apabila berlakunya perbalahan yang akhirnya tragedi yang tidak ingin dengar iaitu pembunuhan mungkin akan berlaku. Tidak dapat disangkal lagi bahawa perbuatan mencela orang lain dilarang keras oleh Allah (SWT) sehinggakan disebut tentang perbuatan tersebut dalam firman-Nya (surah al-Humazah 104:1).

Fathi Yakan (1983: 172) menyatakan bahawa hak dan kewajipan persaudaraan yang perlu dipatuhi oleh masyarakat antaranya ialah persaudaraan yang boleh membantu mempertingkatkan ketaatan kepada Allah (s.w.t), persaudaraan yang lebih kepada cuba memenuhi keperluan orang lain dan persaudaraan ke arah bekerjasama dalam kebendaan. Bertepatan dengan hadis riwayat Bukhari dan Muslim, daripada Ibn ‘Umar (r.a) bahawa Rasulullah (s.a.w) bersabda:

المُسْلِمُ أَخُو الْمُسْلِمِ لَا يَظْلِمُهُ وَلَا يَسْلِمُهُ ' مَنْ كَانَ فِي حَاجَةِ أَخِيهِ كَانَ اللَّهُ فِي حَاجَتِهِ ' وَمَنْ فَرَّجَ عَنْ مُسْلِمٍ كُرْبَةً فَرَّجَ اللَّهُ عَنْهُ بِهَا كُرْبَةً مِنْ كُرْبِ يَوْمَ الْقِيَامَةِ وَمَنْ سَتَرَ مُسْلِمًا سَتَرَهُ اللَّهُ يَوْمَ الْقِيَامَةِ

Maksudnya: “Seorang muslim ialah saudara kepada sesama muslim lain, tidak boleh menganiaya dan membiarkan dianiayai, sesiapa yang memenuhi hajat saudaranya maka Allah akan laksanakan hajatnya. Dan sesiapa yang membebaskan kesukaran seorang muslim Allah akan membebaskan kesusahannya di hari kiamat. Dan sesiapa yang menutupi aib seorang muslim Allah akan menutupi aibnya di hari akhirat nanti”. (al-Nawawi 1995: 233).

Akhirnya, ingin ditegaskan persaudaraan Islam ini tidak terbatas antara bangsa Melayu semata-mata, namun ia menyeluruh kepada semua bangsa dan keturunan. Islam bersatu di atas kalimah tauhid yang satu iaitu “Tiada Tuhan Melainkan Allah dan Muhammad itu Pesuruh Allah”. Persaudaraan Islam perlu digarap kepada pelajar agar turut merasa sensitiviti dan peka dengan apa yang berlaku di luar negara seperti nasib umat Islam di Palestin, Syria dan sebagainya. Ternyata juga Islam bukanlah mementingkan keturunan tetapi ketakwaan kepada Allah yang diutamakan seperti firman Allah (SWT) dalam surah al-Hujurat (49:13) di atas.

Kesimpulan

Berdasarkan perbincangan di atas dapat disimpulkan, Islam dari awal lagi sudah meletakkan asas-asas penting dalam hal pergaulan bermula di rumah dan di luar rumah seperti sekolah dan masyarakat. Para pelajar sekolah perlu diterapkan dengan adab dan batas pergaulan terutama antara lelaki dan perempuan. Mereka perlu dipastikan agar dapat menghayati apa yang dipelajari seperti dalam mata pelajaran Pendidikan Islam dan bukanlah mempelajari secara teori sahaja untuk menjawab soalan peperiksaan. Begitu juga dengan anak-anak di rumah, para ibubapa perlu menyemai seawal dari zaman kanak-kanak lagi dengan didikan agama seperti adab memberi salam dan cara berpakaian.

Melalui pemerhatian penyelidik, adab dan batasan pergaulan terutama antara lelaki dan perempuan pada peringkat remaja banyak mendorong kepada perkara-perkara maksiat yang akhirnya akan berlaku jenayah-jenayah yang lebih besar dan berat umpamanya kes rogol dan bunuh. Anak-anak yang dilahirkan luar nikah akan terhasil. Fenomena ini yang membimbangkan masyarakat Islam khususnya dan masyarakat dunia amnya. Mengikut statistik pada tahun 1983 di New York, satu pertiga daripada kelahiran anak adalah anak yang tidak sah taraf atau luar nikah. Majoriti mereka dilahirkan oleh gadis berumur 19 tahun ke bawah dan jumlah mereka adalah 112,353 orang bayi atau 37% dari jumlah anak-anak yang dilahirkan di New York (al-Qaradawi 2000: 164) Malah bagi tempoh empat bulan pertama tahun 2010, sejumlah 24 kes pembuangan bayi dilaporkan. Ini menyamai *trend* membunuh tiga nyawa tidak berdosa bagi setiap dua minggu atau dengan kata lain, wujud 3 pembunuh atau pembuang senyap dalam setiap minggu (www.islam.gov.my).

Adapun kes pembuangan bayi yang selalu dikaitkan anak luar nikah yang berlaku dalam negara Malaysia juga begitu membimbangkan. Merujuk kepada statistik kes pembuangan bayi daripada rekod Polis Di Raja Malaysia (PDRM) daripada tahun 2004 hingga 2010 sebanyak 555 kes semuanya dilaporkan. Kes pembuangan bayi ini berkait dengan anak luar nikah yang berpunca dari pergaulan bebas tanpa batasan antara lelaki dan perempuan bukan muhrim seperti yang dibicarakan. Langkah-langkah sewajarnya perlu diambil bagi membendung kes tersebut.

Jadual 1 Statistik Pembuangan Bayi

Tahun	Lelaki	Perempuan	*Tidak diketahui	Jumlah
2004	22	30	26	78
2005	23	20	24	67
2006	37	27	19	83
2007	25	18	22	76
2008	37	25	40	102
2009	15	12	52	79
2010 (Jan – Ogos)	34	25	11	70
Jumlah				555

Sumber PDRM
* Tidak diketahui kerana reput

Sumber: PDRM; *Harian Metro* 15 Disember 2010

Oleh yang demikian, seeloknya di setiap sekolah menengah dibuat pengasingan tempat belajar antara lelaki dan perempuan adalah atas dasar kaedah *fihiyyah Sadd al-Dhara'i'*. Batasan pergaulan pelajar perlu diberi perhatian oleh pihak berkaitan kerana dari sinilah bermulanya penghayatan nilai murni dalam pergaulan dapat dipraktikkan selain di rumah ketika bersama keluarga.

Sebagai mengakhiri kajian ini, penyelidik ingin membuat kesimpulan bahawa pergaulan berlandaskan kehendak agama dalam kelompok kecil ini menunjukkan interpretasi masyarakat futuristik dalam kelompok besar yang kaya dengan nilai-nilai murni apabila mereka menjalani kehidupan sebenar kelak. Tingkah laku generasi muda pada hari ini menggambarkan perangai masyarakat pada masa akan datang. Harapan untuk melihat generasi baharu menjaga tatasusila semasa berinteraksi dengan pelbagai pihak sememangnya menuntut paduan tenaga daripada pelajar sendiri, ibu bapa, sekolah dan masyarakat sekeliling. Penyelidik mengharapkan agar pelajar atau anak yang berwibawa hasil daripada didikan agama seperti topik yang dibicarakan ini mampu menjana pergaulan yang sifar daripada kebejatan sosial hingga suatu hari kelak dapat ditiru dan diteladani oleh generasi selepasnya.

Hasil kajian ini mendapati bahawa adab-adab memberi salam dan cara berpakaian menurut Islam sudah jelas dan lengkap serta relevan diamalkan sepanjang masa termasuk dalam era globalisasi ini. Islam adalah agama yang menitikberatkan pergaulan yang mesra dan mementingkan penjagaan maruah seseorang seperti dalam penjagaan aurat antara sesama insan. Penghayatan terhadap amalan mulia ini akan dapat menghindarkan diri dari terjebak dalam kancah pergaulan bebas yang membawa kepada kerosakan dan kemurkaan Allah SWT. Implikasi kajian adalah perlunya sesebuah organisasi terutamanya peringkat sekolah membuat penambahbaikan bagi mendidik para pelajar untuk menghayati amalan tersebut sesama warga sekolah. Seterusnya nanti amalan tersebut akan berkembang dalam kehidupan bermasyarakat.

Rujukan

al-'Asqalani, Ibn Hajar. 1986. *Fath al-Bari bi Sharh al-Bukhari*. al-Qahirah: Matba'ah Mustafa al-Babi al-Halabi.

- al-Busti, Abu Sulayman ibn Ahmad ibn Muhammad al-Khattabi. 1991. *Ma'alim al-Sunan, Sharh Sunan Abi Dawud*. Jil. 2. Bayrut: Dar al-Kutub al-'Ilmiyyah.
- Harian Metro. 2010. Statistik PDRM Kes Pembuangan Bayi 2004-2010. 15 Disember.
[http: www.islam.gov.my](http://www.islam.gov.my) (Jabatan Kemajuan Islam Malaysia)
- Ibrahim, Anis. t.th. *al-Mu'jam al-Wasi'*. Bayrut: Muassasah al-Risalah
- Kamus Dewan*. 1996. Kuala Lumpur: Dewan Bahasa dan Pustaka.
- al-Mundhiri, Zaki al-Din 'Abd al-'Azim. 2004. *Ringkasan Sahih al-Bukhari*. Terj. Selangor. Crescent News (KL) Sdn. Bhd.
- al-Nawawi, Muhy al-Din Abu Zakariyya Yahya ibn Sharf. t.th. *al-Adhkar al-Muntakhibah min Kalam Sayyid al-Abrar (saw)*. al-Qahirah: Dar al-Kutub al-'Arabiyyah.
- al-Nawawi, Muhy al-Din Abu Zakariyya Yahya ibn Sharf. 1995. *Riyad al-Salihin min Kalam Sayyid al-Mursalin*. Terj. H. Salim Bahreisy. Kuala Lumpur: Victory Agency.
- Nik Ismah Nik Abdul Rahman. 1989. *Bentuk Pakaian Wanita Islam Bekerja*. Kuala Lumpur: Bahagian Agama Jabatan Perdana Menteri.
- al-Qaradawi, Yusuf. 1993. *al-Halal wa al-Haram fi al-Islam*. al-Qahirah: Maktabah Wahbah.
- al-Qaradawi, Yusuf. 2000. *Wanita dalam Masyarakat Islam Menurut al-Quran dan al-Sunnah*. Terj. Muhammad Baihaqi. Kuala Lumpur: al-Hidayah Publishers.
- T al-irmidhi, Muhammad 'Isa bin Surah. 1993. *Sunan al-Tirmizi*. Terj. H. Mohd Zuhri. Kuala Lumpur: Victory Agency.
- Yakan, Fathi. 1983. *Madha Ya'ni 'an Intima'i li al-Islam*. Bayrut: Muassasah al-Risalah.
- al-Zuhayli, Wahbah. 1991. *al-Tafsir al-Munir fi al-'Aqidah wa al-Shari'ah wa al-Manhaj*. Beirut: Dar al-Fikr al-Mu'asir.